

आकाशवाणी

पैहले खास-खास खबरां:-

1. संसद दे बजट सत्र दा बधाया गेदा विशेष इजलास अज्जै थमां शुरु होआ रदा ऐ- जेहदे च त्रंऊ दिनें तगर “नारी शक्ति वंदन” अधिनियम च प्रस्तावित तरमीमें पर चर्चा होग।
2. केई राज्यें च मरदमशुमारी तैहत मकानें दी गिनत्री दा पैहला गेड़ अज्ज शुरु होआ रदा ऐ।
3. छत्तीसगढ़ सरकारें समान नागरिक संहिता UCC दा मसौदा तयार करने लेई इक उच्ची सतह दी कमेटी खड़ेने दा फैसला लैता ऐ।
4. प्रधानमंत्री नरेन्द्र मोदी होर अज्ज नमीं दिल्ली च आस्ट्रेलिया दे चान्सलर डाक्टर क्रिश्चियन स्टॉकर हुंदे नै गल्लबात करगंन- जेहदे नै दौनें मुख्यें बश्कार बक्ख-बक्ख क्षेत्रें च साथ-सहयोग बधने दी मेद।
5. 2025-26 आहले माली बरे दौरान भारत दा निर्यात 860 अरब डॉलर दा रिकार्ड आंकड़ा पार करी गेआ ऐ।
6. भारत दी ग्रैंड मास्टर आर. वैशाली नै साइप्रस च आयोजित फिडे महिला कैडिडेंट्स टूर्नामेंट दा खताब जिती लैता ऐ।
7. आई.पी.एल. च अज्ज मुम्बई इंडियन्स दा मकाबला पंजाब किंग्स कन्नै होग। कल रॉयल चैलेंजर्स बेंगलुरु नै लखनऊ सुपर Giants गी 5 विकेटें कन्नै हराया।

<><><><><><>

Budget Session Spl Sitting

संसद दे बजट सत्र दा त्रंऊ दिनें लेई बधाया गेदा विशेष इजलास अज्जै थमां शुरु होआ रदा ऐ। एह विशेष इजलास अज्ज- कल ते अतरु त्रै दिन धोड़ी चलोग- जेहदे च चेचे तौरा पर “नारी शक्ति वंदन” अधिनियम च तरीमीमें पर ध्यान केन्द्रित कीता जाहग। इस अधिनियम पर अमल लेई सरकार त्रै तरमीमी बिल पेश करोग। लोकसभा ते राज्य विधान सभाएं च महिलाएं गी 33 प्रतिशत आरक्षण लेई इस अधिनियम गी 2023 च पास कीता गया हा। कांग्रेस अध्यक्ष ते राज्यसभा च विरोधी धड़े दे नेता मल्लिकार्जुन खडगे होरें आखेआ ऐ कि सब्बै विरोधी पार्टियां महिला आरक्षण विधेयक दे हक्कै च न- पर उ’नें विधेयक आंदे जाने दिए तरीकें पर शैंका प्रगट कीती। खडगे होरें INDI ब्लाक दी बैठक दे बाद नमीं दिल्ली च आखेआ कि एह विधेयक सियासी मफाद हासल करने लेई आंदा गया ऐ।

<><><><><><>

MHA- Housing Census

गृहमंत्रालय नै घोषणा कीती ऐ जे मरदमशुमारी तैहत मकानें दी गिनतरी दा पैहला गेड़ अज्जै थमां केई राज्यें ते केन्द्र शासित प्रदेशें च शुरु होआ रदा ऐ। जारी ब्यानै च मंत्रालय नै आखेआ ऐ जे एह अभियान अंडमान ते निकोबार द्वीप समूह गोवा- कर्नाटक- लक्षद्वीप- मिजोरम- ओडिशा ते सिक्किम सनें NDMC ते दिल्ली छावनी च शुरु होआ रदा ऐ।

<><><><><><>

Chhatisgarh -UCC

छत्तीसगढ़ सरकारै समान नागरिक संहिता UCC दा मसौदा तयार करने लेई इक उच्ची सतह दी कमेटी खड़ेने दा फैसला लैता ऐ। एह फैसला कल रायपुर च मुखमंत्री विष्णु देव साय हुंदी अध्यक्षता च लग्गी दी मंत्रीमंडल दी बैठका च लैता गया। एहदा उद्देश्य धार्मिक ते लैंगिक बरोबरी गी बढ़ावा देना ते कन्नूनें गी सखल्ला बनाना ऐ। साबका न्यायधीश रजंना प्रकाश देसाई होर इस कमेटी दियां अध्यक्ष होगन। फिलहाल छत्तीसढ़ च बेआह- तलाक- गोद लेना- सम्पत्ति दा वापस- गुजारा भत्ता ते घरेलू मसलें जनेए मामलें दा नबेड़ा करने लेई बक्ख-बक्ख कन्नूनें दी मदद लैती जंदी ऐ ते UCC दी मदद कन्नै हर धर्मजाति या तबदे दे लोकें लेई इक्क बरोबर ते इक्के नेह नियम-कन्नू लागू होगन।

<><><><><><>

PM -Australian Chancellor

प्रधानमंत्री नरेन्द्र मोदी होर अज्ज नमी दिल्ली च आस्ट्रेलिया दे चांसलर डाक्टर क्रिश्चियन स्टॉकर हुंदे कन्नै गल्लबात करगन। इंदे च बहुपक्खी मंचें पर सहयोग ते आपसी हितें दे मुद्दे पर बिचार-बटांदरा शामिल ऐ। विदेश मंत्री डाक्टर एस. जयशंकर होरें इक सोशल मीडिया पोस्ट पर मेद प्रकट कीती ऐ कि इस चर्चा कन्नै दौनें मुख्यें बश्कार केई बक्ख-बक्ख क्षेत्रें च व्यापक साथ-सहयोग लेई बत पदरी होग। चांसलर स्टॉकर हुंदी एह पैहली भारत यात्रा ऐ। उन्दे कन्नै उच्ची सतह दा इक शिष्टमंडल बी आए दा ऐ। प्रधानमंत्री नरेन्द्र मोदी होरें जुलाई 2024 च आस्ट्रेलिया दा दौरा कीता हा।

<><><><><><>

Haj –Flights

जम्मू-कश्मीर दी हज कमेटी नै ऐलान कीता ऐ जे इस बर्रे दी हज जातरा लेई श्रीनगर थमां डोआरियां औंदी 18 अप्रैल थमां शुरू होडन। आकाशवाणी दे जम्मू संवाददाता दी रिपोर्ट मूजब पैहली त्रै डोआरियां उस्सै ध्याड़े लेई तय न। श्रद्धालुएं गी आखेआ गेआ ऐ जे ओह् उनेंगी दिते गेदे समें दे मताबक गै श्रीनगर दे बेमीना आले हज हाउस च रिपोर्ट करन। कमेटी नै सबनें श्रद्धालुएं गी गुजारश कीती ऐ जे ओह् ब्हाई अड्डे पर अपनी रवानगी आली प्रक्रिया गी बवस्थित बनाने लेई रिपोर्टिंग दे समें ते अपने समेयान मतल्लक दिशा-निर्देशों दी पालमा जकीनी बनान। ध्यानजोग ऐ जे जम्मू-कश्मीर थमां इस बर्रे कुल 4 जहार 704 श्रद्धालु हज जातरा लेई जा करदे न।

<><><><><><>

Goyal -Record Export

उद्योग ते बपार मंत्री पीयूष गोयल होरें आखेआ ऐ कि 2025-26 आहले माली बरे दौरान भारत दा निर्यात 860 अरब डालर दा आंकड़ा पार करी गेआ- जेहड़ा जे अपने-आपै च इक रिकार्ड ऐ। इक सोशल मीडिया पोस्ट च गोयल होरें आखेआ कि केई कुल संसारी चुनौतियें दे बावजूद एह उपलब्धि देसै दे लचीलेपन ते अंतराष्ट्रीय सतह पर बपार च विस्तार करने दी उप्परोतली बधदी छमता गी दर्शादी ऐ। गोयल होरें आखेआ कि प्रधानमंत्री नरेन्द्र मोदी हुंदे नेतृत्व च होए दे 9 बपार समझौते कन्नै इसी रफ्तार थहोआ करदी ऐ ते नमें बजारें तगर भारत दी पुज्ज बधै करदी ऐ। उ'नें आखेआ कि बपार च सखाल ते रासपूंजी लाने लेई साज़गार म्हाँल नै बी इसी रफ्तार फगड़ने च मदद कीती ऐ। इससै दौरान बपार संघ Asso CHAM दे अध्यक्ष निर्मल मिंडा होरें मेद

प्रगट कीती ऐ कि अंतराष्ट्रीय बजारें च भारत दी बधदी मंग ते मकाबलेबाजी कन्ने 2026-27 च भारत दा निर्यात इक ट्रिलियन डॉलर कोला उप्पर पुज्जी जाहग।

<><><><><><>

UP Accident

उत्तर प्रदेश दे प्रयागराज च कल रातीं 8 बजे इक ट्रेन दी चपेट च औने करी 5 लोकें दी मौत होई गई ऐ। एह हादसा करछना क्षेत्र दे पचदेवरा हाल्ट पर होआ। हादसे दे मौके पर किश यात्री ट्रेन थमां उतरे रदे हे। उससै बेल्लै दुई पेठा दा आवा'रदी ट्रेन नै 5 लोकें गी टक्कर मारी दिती। पुलिस ते रेलवे पुलिस नै मौके पर पुज्जिए लोथें गी कब्जे च लैता ते उनें'गी Post Mortem लेई भेजी दिता ऐ। मारे गेदे लोकें दी पंछान कीती जा'रदी ऐ।

<><><><><><>

NCW- TCS Case

राष्ट्रीय महिला आयोग नै महाराष्ट्र च नासिक दे टाटा कंसल्टेंसी सर्विसेस च महिलाएं कन्ने यौन उत्पीड़न दी खबरे दा आपू संज्ञान लैंदे होई जांच समीति कायम कीती ऐ। समीति दे बारे च दस्सदे होई आयोग नै आखेआ जे तथ्यें दा पता लाने लेई जेड़ी कमेटी कायम कीती गई ऐ ओह इस मामले दी व्यापक जांच करोग। शनिवारें आयोग उस थाहर दा बी दौरा लाग। आयोग गी व्यापक रिपोर्ट सौंपने लेई समीति गी 10 दिनें दा समां दिता गेआ ऐ।

<><><><><><>

LG HAP-Day

जम्मू आहले लोकभवन च कल हिमाचल प्रदेश स्थापना दिवस मनाया गेआ। इस मौके पर उपराज्यपाल मनोज सिन्हा होर मुख परौहने हे। किट्ठै गी सम्बोधित करदे होई उपराज्यपाल होरें आखेआ जे हिमाचल प्रदेश दा इतिहास समृद्ध- बन्न-सबन्नता- आध्यात्मिक ते रीति-रिवाजें आहला ऐ ते इय्यै इस राज्य दे समाजी ताने-बाने कन्नै जुड़े दा ऐ। उ'नें आखेआ जे हिमाचल दिवस दा आधार विरासत दा संगम ऐ। उ'नें आखेआ जिसले बक्ख-बक्ख राज्य- उन्दी संस्कृति रिवायत गी नगारिक ते कलाकार किट्ठे करदे न- इक थाहर पर औन्दे न तां ओह अन्नदिक्खे धागे सब्बनें गी इक-दुए कन्नै जोड़दे न।

<><><><><><>

Chess

ते हून शतरंज भारत दी ग्रैंड मास्टर आर. वैशाली नै कल साइप्रस च आयोजित फिडे महिला कैंडिडेट्स टूर्नामेंट दा खताब जिती लैता। 24एं बरे दी वैशाली नै खताबी मकाबले च रुस दी कैटेरीना लैग्नो गी रहाया। इस जित दे कन्नै गै वैशाली नै इस बरे होने आहली विश्व शतरंज चैम्पियनशिप लेई अपनी थाहर पक्की करी लैती ऐ- जित्थे ओहदा मकाबला चीन दी जू-वेनजुन कन्नै होग। फिडे महिला दे इनें मकाबले च कल ओपन वर्ग च उजबेकिस्तान दे जावोखिर सिंदा रोव नै नीदरलैंड दे अनिश गिरी गी रहाइयै खताब अपने नां कीता सिंदारोव दा इस बरे दे खीरै च मकाबला डी. गुकेश कन्नै होग।

<><><><><><>

IPL

बैंगलुरु दे एम. Chinnaswamy स्टेडियम च खेड्ढे गेदे IPL दे इक मैच च राँयल
चैलेन्जर्स बैंगलुरु नै लखनऊ सुपर Giants गी 5 विकट कन्नै हराया। अज्ज मुम्बई दे
वानखेडे स्टेडियम च मुम्बई इंडियन्स दा मुकाबला पंजाब किंग्स कन्नै संज्रा साइडे 7
बजे होग।

<><><><><><>